

Samtök Sveitarfélaga á Vesturlandi.

# Ályktanir Haustþings SSV

---

Haldið í Gamla Kaupfélaginu á Akranesi

11. október, 2017



SAMTÖK  
SVEITARFÉLAGA  
Á VESTURLANDI

<b>Atvinnumál .....</b>	<b>3</b>
Ferðapjónusta .....	3
Sjávarútvegur .....	3
Landbúnaður .....	4
Grunninnviðir .....	4
Grundartangi .....	4
Þekkingasetur og menntastofnanir .....	5
Verkefni til eflingar svæða .....	5
Þjóðgarðurinn Snæfellsjökull .....	5
<b>Samgöngumál .....</b>	<b>6</b>
Vegamál.....	6
Hafnarmál .....	7
Flugvellir .....	7
Fjarskiptamál .....	7
Almenningssamgöngur .....	7
<b>Opinber þjónusta .....</b>	<b>8</b>
Málefni sveitarfélaga og samskipti við ríkið .....	8
Málefni fatlaðra .....	8
Heilbrigðisþjónusta og öldrunarmál .....	9
Framhalds og háskólar .....	9
Löggæsla .....	10
Jöfnun húshitunarkostnaðar.....	10
Sóknaráætlun Vesturlands .....	10
Málefni um persónuvernd .....	11
Stjórnsýsla ríkisins .....	11

## Ályktanir um atvinnumál:

Haustþing SSV haldið á Akranesi 11. október 2017

### Ferðapjónusta

Ferðapjónusta hefur vaxið gríðarlega á Vesturlandi síðustu ár og áframhaldandi vexti er spáð næstu árin. Margt hefur áunnist, en mikið vantar á að grunngerð og innviðir séu til staðar eða nógu öflugir til að taka á móti auknu álagi. Sú staða sem komin er upp reynir mjög á þolrif heimamanna sem og þolmörk innviða s.s. vegakerfis, heilbrigðisþjónustu, löggæslu, áningarstaða, náttúruverla o.fl. Auk þess vantar enn skýra stefnumótun, regluverk, stýringu og landvörslu sem tekur mið af þeim fjölda ferðamanna sem nú sækja landið heim.

Haustþing SSV fagnar verkefnum um stefnumótun áfangastaða sem unnin eru í samstarfi við sveitarfélögin s.s. Landsáætlun og Áfangastaðaáætlun DMP. Einnig telur haustþingið brýnt að staðið verði við markmið laga landsáætlunar um uppbyggingu innviða fyrir ferðamenn til verndar náttúru og menningarsögulegum minjum og fjármagn verði tryggt til þess. Jafnframt verði tryggt fjármagn og/eða leiðir skapaðar til að fjármagna uppbyggingu innviða, upplýsingagjöf og landvörslu sem þarf að vera til staðar ef vel á að vera.

Farið verði vel yfir hvar og hvernig verði staðið að gjaldtöku af bílastæðum, ferðabílum og öðrum slíkum hlutum á Vesturlandi og tillögum þar um komið inn í áfangastaðaáætlun. Lagt er til að SSV hafi forgöngu um að móta heildstæða stefnu um þessi mál fyrir svæðið.

Haustþing SSV telur mjög aðkallandi að skilgreina og auka hlut sveitarfélaga í tekjustofnum hins opinbera vegna ferðapjónustu.

### Sjávarútvegur

Á Vesturlandi eru sjávarbyggðir þar sem reknar eru litlar og stórar útgerðir, fiskvinnslur og fiskmarkaðir sem eru undirstöðuatvinnuvegur þeirra byggða. Auk þess sem nýsköpun og vöruþróun vex og dafnar við hlið öflugs sjávarútvegs.

Nokkur styr hefur lengi verið í þjóðfélaginu um umgjörð sjávarútvegs á Íslandi, sem skapar óvissu og erfiðleika fyrir þá sem starfa í þeirri atvinnugrein. Mikilvægt er því að skapa sátt og stöðugleika um starfsumhverfi sjávarútvegsins þannig að atvinnuvegurinn geti þróast áfram á grundvelli sjálfbærrar nýtingar, greitt sanngjarnt nýtingagjald af auðlindinni og eflist samfélaginu öllu til hagsbóta.

Mikilvægt er að Hafrannsóknarstofnun rannsaki lífmassa Breiðafjarðar og Faxaflóa um nýtingarmöguleika hafsins á öllum sviðum

Haustþing SSV beinir því til ráðamanna að skapa sátt og stöðugleika um sjávarútveginn, hann byggi á sjálfbærri nýtingu og stuðlað verði að áframhaldandi framþróun og starfsemi öflugs sjávarútvegs í sjávarbyggðum landsins.

## Landbúnaður

Á Vesturlandi eru landbúnaðarhéruð og svæði sem byggja á hefðbundnum fjölskyldubúskap á litlum og stórum búum, þá eru úrvinnslustöð í landbúnaði meðal stærstu vinnuveitenda í Dalabyggð og mikilvægt er að standa vörð um starfsemi þess. Vaxandi áhugi er á heimavinnslu og sölu beint frá býli og mikilvægt er að hlúa vel að þeim sprota.

Sitt sýnist hverjum um það landbúnaðarkerfi sem við búum við í dag og deilur um það í þjóðfélaginu hafa gert starfsumhverfi landbúnaðarins mjög erfitt fyrir. Það er því mjög mikilvægt fyrir landsbyggðirnar að sátt náist um íslenskan landbúnað, þar sem landbúnaður er víða forsenda þess að byggð haldist í sveitum landsins. Landbúnaður og matvælaframleiðsla styður einnig við vöruþróun vegna ferðapjónustu og er byggðafesta fyrir ýmsa byggðakjarna í dreifbýli.

Haustþing SSV lýsir yfir miklum áhyggjum á mjög erfiðri stöðu sauðfjárræktar og bendir á að sauðfjárrækt er grunnatvinnuvegur á hluta Vesturlands, t.d. Dalabyggðar sem jafnframt er svæði sem hefur verið í byggðaþróunarlegri vörn. Haustþing SSV leggur á það áherslu að í aðgerðum stjórnvalda verði hugað að erfiðri stöðu ákveðinna svæða og úrræði hafi það markmið að verja þau svæði sem byggja afkomu sína á sauðfjárrækt. Mikilvægt er að gripið verði til aðgerða strax til að forða fyrir sjáanlegri byggðaröskun verði ekkert aðhafst.

## Grunninviðir

Á sama tíma og miklir erfiðleikar steðja að sauðfjárrækt, blasir það við að erfitt er að nýta tækifæri á öðrum sviðum atvinnulífs í dreifðum byggðum á Vesturlandi, vegna þess að lagningu 3ja fasa rafmagns er allt of stutt á veg komin og trygg rafmangnsafhending er ekki til staðar. Skorað er á stjórnvöld að gerð verði áætlun og átak í styrkingu og nútímavæðingu dreifkerfis raforku á Vesturlandi. Styrking dreifkerfisins er forsenda uppbyggingar á fjölbreyttara atvinnulífi í dreifðum byggðum á Vesturlandi, t.d. ferðapjónustu og nýtingu á nútímatækni í landbúnaði.

Haustþing SSV lýsir yfir ánægju með það sem gert hefur verið í ljósleiðaravæðingu á svæðinu, en vekur jafnframt athygli á því að allt of hægt miði í ljósleiðaravæðingu á ákveðnum svæðum á Vesturlandi og þá helst þeim sem veikust eru. Nauðsynlegt er að gert verði átak í ljósleiðaravæðingu á dreifbýlustu svæðum Vesturlands og þeim hraðað.

## Grundartangi

Iðnaðarsvæðið á Grundartanga hefur mikið og vaxandi hlutverk á suðursvæði Vesturlands. Mikilvægt er að unnið verði að því að nýta þau tækifæri í jákvæðum tilgangi sem núverandi og væntanleg starfsemi á Grundartanga gefur til framþróunar á svæðinu, bæði í þjónustu- og þekkingargreinum af öllum tagi.

Haustþing SSV telur nauðsynlegt að styrkja og tryggja innviði Grundartangasvæðisins með tilliti til raforku, vatns, hafnargerðar og ekki síst samgangna til og frá svæðinu og við höfuðborgarsvæðið, en það er ein mikilvægasta forsenda fyrir framþróun á atvinnuuppbyggingu á Grundartanga .

## Þekkingarsetur og menntastofnanir

Á Vesturlandi eru tveir háskólar, þrír framhaldsskólar, símenntunarstöð og nokkur þekkingar- nýsköpunar- og rannsóknarsetur sem eru gríðarlega mikilvægar stoðir í grunngerð samfélagsins. Þessi starfsemi er mjög mikilvæg fyrir svæðið þar sem helstu sóknarfæri í atvinnuuppbyggingu á næstu árum eru talin verða í þekkingariðnaði.

Haustþing SSV leggur því áherslu á að starfsemi þessara eininga verði eflað og þeim tryggt rekstrarlegt sjálfstæði og fjárhagslegur rekstrargrundvöllur, enda hefur starfsemi þessara stofnanna haft jákvæð mælanleg áhrif á þekkingarstig á Vesturlandi.

## Verkefni til eflingar svæða

Sveitarfélög eða svæði, auk atvinnulífs og félagasamtaka á Vesturlandi hafa sýnt frumkvæði í að koma á fót verkefnum til að styrkja byggð og atvinnuuppbyggingu. Þar má t.d. nefna verkefni eins og Svæðisgarðurinn Snæfellsnes og Saga jarðvang í Borgarfirði.

Haustþing SSV hvetur stjórnvöld til að styðja við og tryggja fjármagn til að viðhalda slíkum sjálfsprottum svæðisbundnum verkefnum og nýta þá vinnu sem þar er unnin til stefnumótunar og uppbyggingar. Ennfremur þarf að vera jákvæðni fyrir fjármagni í ný verkefni sem ráðist verður í.

## Þjóðgarðurinn Snæfellsjökull

Þjóðgarðurinn Snæfellsjökull hefur stóru hlutverki að gegna varðandi verndun náttúru- og menningarminja auk þekkingarmiðlunar og þjónustu við ferðamenn sem sækja Vesturland heim.

Haustþing SSV lýsir yfir vonbrigðum með að byggingarframkvæmdum við nýja þjóðgarðsmiðstöð á Hellissandi séu ekki hafnar, þrátt fyrir að fyrir liggi fjármögnun á verkefninu. Traust var lagt á að nú yrði ráðist í þær framkvæmdir af fullum krafti og fjármagn verði tryggt til að ljúka þeim fljótt og vel.

Haustþing SSV lýsir yfir mikilli ánægju og stuðningi við áform við skipulagsbreytingar á þjóðgöörðum með stofnun Þjóðgarðsstofnunar.

Haustþing SSV vill áréttta vilja heimamanna til að taka yfir stjórn þjóðgarðsins Snæfellsjökuls þannig að hann verði rekinn á sömu forsendum og með sambærilegum stuðningi og Þjóðgarðurinn Vatnajökull.

# Ályktun um Samgöngumál

Haustþing SSV 2017

Haustþing SSV haldið á Akranesi, 11. október 2017 leggur fram eftirfarandi ályktanir um samgöngumál sem byggja á einróma samþykktri Samgönguáætlun Vesturlands 2017-2029:

## Vegamál

Tvöföldun vegar á Kjalarnesi er óhjákvæmileg framkvæmd vegna aukinnar umferðar og öryggis vegfarenda m.a. vegna fjölgunar ferðamanna. Samkvæmt vegáætlun á verkefnið að hefjast árið 2018 og er nauðsynlegt að svo verði. Þá er mikilvægt að hefja nú þegar undirbúning að veglínu og framkvæmdaáætlun um endurbætur á Þjóðvegi 1 um Hvalfjarðarsveit í Borgarnes. Því skorar Haustþing SSV 2017 á stjórnvöld að hefja þegar í stað vinnu við tvöföldun vegar frá Reykjavík í Borgarnes og að framkvæmdum verði lokið á næstu átta árum.

Haustþing SSV skorar á Vegagerðina og Reykjavíkurborg að hefja án tafar undirbúning að lagningu Sundabrautar, sem bætir umferð til og frá höfuðborginni og eykur umferðar- og almannaöryggi. Því fyrr sem raunhæfur undirbúningur verkefnisins hefst eru líkur á að framkvæmdir geti farið af stað innan fárra ára.

Samhliða þessu eru ljóst að fara þarf í tvöföldun Hvalfjarðaganga á næstu árum ef og þegar hámarki umferðar um göngin skv. reglugerð verður náð. Ríkissjóður verður tímanlega að hafa frumkvæði að nauðsynlegum undirbúningi og framkvæmd.

Afar brýnt er að framkvæmdum við veginn um Fróðárheiði ljúki á árinu 2018 og framkvæmdum við veginn um Uxahryggi verði haldið áfram og þær klárast eigi síðar en árið 2020. Vinna við þessa vegi hefur staðið yfir í mörg undanfarin ár og þeim verður að ljúka sem fyrst.

Mikilvægt er að Vegagerðin geri sérstaka úttekt á tengivegum á Vesturlandi og forgangsraði framkvæmdum m.t.t. umferðar og mikilvægis. Verkefnið verði unnið í samvinnu við SSV. Áhersla verði lögð á að bundið slitlag verði komið á alla tengivegi í byggð fyrir 2029. Þá er lagt til að teknað verði upp viðræður við sveitarstjórn Borgarbyggðar um endurskoðun á nýtingu áætlaðs fjármagns til endurbóta á Þjóðvegi 1 um Borgarnes.

Á þessu ári hófust lagfæringar á veginum um Skógarströnd. Mikilvægt er að hönnun endurbóta hans og gerð tímasettrar verkáætlunar framkvæmda liggja fyrir sem fyrst. Þá er nauðsynlegt að hefja framkvæmdir við lagningu slitlags þar sem undirbyggingu er lokið.

Nú þegar þarf að hefjast handa við að tvöfalda einbreiðar brýr á Vestfjarðavegi í Dalabyggð til að tryggja umferðaröryggi.

Ljóst er, að gera þarf nauðsynlegar öryggisúrbætur á gatnamótum tengivega og Þjóðvegur 1 og þeim lokið eigi síðar en árið 2020. Þá er mikilvægt að fjölga útskotum á fjölförnum vegum, tryggja að góðar girðingar séu meðfram vegum og ráðast í öryggisaðgerðir á stöðum þar sem stórviðri eru algeng.

SSV fagnar framkominni skýrslu starfshóps um fjármögnun framkvæmda við helstu stofnleiðir til og frá höfuðborgarsvæðinu og telur að hún muni stuðla að aukinni umræðu um þau risavöxnu verkefni sem blasa við í samgöngum og umferðaröryggismálum á Vesturlandi.

Loks felur Haustþing SSV stjórn samtakanna að standa fyrir ráðstefnu um það hvernig greiðar samgöngur innan Reykjavíkur hafi áhrif á ferðavenjur og öryggi íbúa á Vesturlandi og höfuðborgarsvæðinu.

## Hafnarmál

Mikilvægt er að samgönguáætlun geri ráð fyrir framlagi til þeirra verkefna í hafnamálum sem eru áætluð á næstu árum á Vesturlandi. Þar eru m.a. verkefni í höfnum Snæfellsbæjar, í Grundarfirði og í Stykkishólmi.

Fyrirhugaðar eru framkvæmdir við landfyllingu og breikkun aðalhafnargarðs á Akranesi og nauðsynlegt er að samgönguyfirvöld komi að því verkefni til þess að tryggja stöðu fiskvinnslu og útgerðar frá Akranesi.

Skarðsstöð í Dalabyggð gegnir hlutverki fyrir smábáta og nauðsynlegt að endurbæta aðstöðu þar.

Þá er lögð áhersla á að haldið verði áfram af krafti við úrlausn verkefna á sviði sjóvarna á Vesturlandi.

## Flugvellir

Mikilvægt er að gert verði ráð fyrir viðhaldi á þeim lendingarstöðum sem eru á Vesturlandi.

Endurbæta verður slitlag á Stóra Kroppi.

Mikilvægt er að lendingarstaðurinn á Rifi verði endurbættur þannig að hann geti gengt hlutverki sínu í neyðartilfellum. Lögð er rík áhersla á að þylum verði áfram tryggt eldsneyti á flugvöllinum á Rifi, enda gegnir flugvöllurinn mikilvægu öryggishlutverki í því efni.

## Fjarskiptamál

Nauðsynlegar framkvæmdir við ljósleiðaratengingu á Vesturlandi nema um 1,0 milljarði. Í áætlun ríkisstjórnarinnar er gert ráð fyrir að verkefni samkvæmt þingsályktun ljúki árið 2020. Það er stefna sveitarfélaga á Vesturlandi að á árunum, 2018, 2019 og 2020 fái st. árlega 250,0 m.kr. til að ljúka verkefninu á Vesturlandi. Hugað verði sérstaklega að stöðu í hinum dreifðari byggðum landshlutans eins og t.a.m. í hinum víðfeðmu sveitarfélögum Borgarbyggð og Dalabyggð.

Skorað er á fjarskiptasjóð og Bygðastofnun að tryggja fjármagns til þessa verkefnis þannig að því ljúki eigi síðar en árið 2020.

Nauðsynlegt er að ráðin verði bót á lélegu farsímasambandi á afmörkuðum svæðum við þjóðveg 1, í dreifbýli og á vinsælum útivistarsvæðum á Vesturlandi af öryggisástæðum.

Vesturland er ákjósanlegur staður fyrir tengingu á háhraðafjarskiptastreng við útlönd enda utan skilgreindra hamfararsvæða. Í því felast miklir möguleikar í uppbyggingu gagnavera og gagnavinnslu á Vesturlandi.

## Almenningssamgöngur

Almenningssamgöngur eru mjög mikilvægar fyrir Vesturland en rekstur þeirra hefur gengið mjög erfiðlega á árinu 2017 og ljóst að verkefnið er vanfjármagnað. Samningur SSV við Vegagerðina um umsjón með almenningssamgöngum á Vesturlandi rennur út í árslok 2018. Mikilvægt er hefja nú þegar viðræður við Vegagerðina og samgöngu- og sveitarstjórnarráðuneytið um forsendur og fjárveitingar til þessa verkefnis.

## Ályktanir um opinbera þjónustu:

Haustþing SSV haldið á Akranesi 11. október 2017

### Opinber þjónusta - málefni sveitarfélaga og samskipti við ríkið

Opinber þjónusta sem veitt er af sveitarfélögum og ríki hefur mikil áhrif á lífsgæði fólks, vöxt og viðgang samfélaga. Ríkið er skuldbundið samkvæmt samningum til að fjármagna hluta af þeirri þjónustu sem sveitarfélögin inna af hendi. Mikilvægt er að skerpa skil á því hvaða þjónusta tilheyrir hvoru stjórnarsýslustigi. Nauðsynlegt er að viðeigandi tekjustofnar og fjármögnun þeirra þátta opinberrar þjónustu sem sveitarfélögin bera ábyrgð á, sé með þeim hætti að sveitarfélögin geti sinnt þjónustunni sem skyldi. Mikilvægt er að kostnaðarmeta öll frumvörp, reglugerðir og aðrar stjórnvaldsákvæðanir ríkisins sem hafa áhrif á verkefni og rekstur sveitarstjórnarstigsins. Á undanförunum árum hefur þeim tilvikum fjölgað þar sem ýmis verkefni og ábyrgð á þeim hafa verið færð til sveitarfélaganna án samráð og að eðlilegt fjármagn hafi fylgt þeim verkefnum.

Haustþing SSV leggur áherslu á mikilvægi þess að samráð sé haft, raunhæft kostnaðarmat sé gert og nægt fjármagn fylgi verkefnum sem ríkið ætlar sveitarfélögunum að taka yfir og annast.

### Málefni fatlaðra

Þrátt fyrir auknar fjárveitingar í kjölfar endurskoðunar á samningi um málefni fatlaðra eru sveitarfélög enn víða að greiða með þjónustu við fatlaða. Ekki er svigrúm til að efla þá þjónustu sem fötluðum er veitt í sveitarfélögunum né heldur að byggja upp þjónustu þar sem hún er ekki til staðar. Því er ljóst að enn skortir fjármagn til þess að sveitarfélögin á Vesturlandi geti staðið undir þjónustu við fatlaða einstaklinga sem þar búa, til að lögum og reglugerðum varðandi þá þjónustu sé uppfyllt.

Haustþing SSV bendir á að þrátt fyrir að þjónustumat hafi verið gert, þá hefur raunhæft kostnaðarmat sem byggir á þjónustumatinu ekki verið gert. Því hafa fjárveitingar til sveitarfélaganna ekki tekið mið af þeirri þjónustuþörf sem er til staðar á hverjum stað, en mikilvægt er að það sé tryggt.

Haustþing SSV leggur áherslu á að NPA-þjónusta verði lögbundin. Haustþingið ítrekar jafnframt mikilvægi þess að raunhæf kostnaðargreining verði gerð á allri samfélagsþjónustu sem sveitarfélögin eigi að veita fyrir hönd ríkisins. Þannig að allar fjárveitingar til þeirra verkefna taki ávallt mið af uppfærðu kostnaðarmati, sem byggir á þeim kröfum sem settar eru fram í lögum og reglugerðum varðandi þá þjónustu sem á að veita.

Haustþing SSV telur einnig afar brýnt að til verði sérstakur tekjustofn sem fjármagnar nauðsynlega uppbyggingu á þjónustu og aðstöðu fyrir fatlaða.



## Heilbrigðisþjónusta og öldrunarmál

Góð heilbrigðisþjónusta er forsenda fyrir búsetu á Vesturlandi. Mikilvægt er að áfram verði unnið að því að styrkja rekstrargrundvöll HVE og annarra heilbrigðis- og öldrunarstofnanna á Vesturlandi.

Haustþing SSV skorar á ríkisvaldið að tryggja fjármagn til að endurnýja og efla tækjakost sjúkrahúsanna á Akranesi og í Stykkishólmi sem og á heilsugæslustöðvum umdæmisins. Vegna niðurskurðar og takmarkaðra fjárveitinga til tækjakaupa síðastliðin ár, er uppsöfnuð þörf á viðhaldi og endurnýjun búnaðar orðin mjög aðkallandi. Mikilvægt er að örugg tæki og búnaður sé til staðar á sjúkrahúsunum á Vesturlandi svo hægt sé að sinna þeirri þjónustu sem þar er til staðar.

Haustþingið SSV hvetur einnig til þess að skoðað verði hvernig sjúkrahúsin geti styrkt grundvöll sinn með sérhæfingu og sérverkefnum.

Heilsugæslustöðvar eru mjög mikilvægar í öllum byggðarlögum. Þær þurfa að vera í stakk búnað til að mæta þörfum íbúa svæðisins á hverjum tíma, auk þess að sinna stórauðnum fjölda ferðafólks og sumarhúsafólks sem sækir svæðið heim og þarf á heilbrigðis og slysaþjónustu að halda.

Haustþing SSV áréttar mikilvægi þess að efla starfsemi heilsugæslustöðva á Vesturlandi þannig að þær geti áfram sinnt starfsemi sinni og tryggð verði viðvera lækna og menntaðs heilbrigðisstarfsfólks alla daga á heilsugæslustöðvum umdæmisins.

Rekstrarumhverfi hjúkrunar- og dvalarheimila er erfitt þó nýr rammasamningur sem gildi tók á síðastliðnu ári á milli heimilanna og Sjúkratrygginga Íslands, hafi létt róðurinn að einhverju leyti. Mörg sveitarfélög hafa þurft að koma beint að rekstri heimilanna þó málaflokkurinn sé alfarið á ábyrgð ríkisvaldsins. Mikilvægt er að áfram verði unnið að bættu rekstrarumhverfi þessara stofnana, hugað verði að fjölgun rýma á þeim svæðum þar sem þörf er á og aðbúnaður bættur.

Haustþing SSV vil benda sérstaklega á að fyrir liggur fjárheimild til að fara í endurbætur á húsnæði HVE í Stykkishólmi og samþætta þannig öldrunarþjónustu í Stykkishólmi, en athafnir hafa ekki fylgt þeim samþykktu fjárheimildum. Haustþingið hvarf þá vondu stöðu og hvetur ríkisvaldið til tafarlausra athafna varðandi endurbætur á húsnæði HVE í Stykkishólmi.

## Framhalds- og háskólar

Á Vesturlandi eru öflugar menntastofnanir sem gegna lykilhlutverki við uppbyggingu búsetu á svæðinu. Mikilvægt er að menntastofnanir á Vesturlandi haldi sjálfstæði sínu, en leitað verði leiða til að auka samstarf þeirra á milli til að nýta betur mannauð og opinbert fjármagn. Haustþing SSV hvetur til þess að ríkið móti sér heildræna stefnu í uppbyggingu háskólastigsins og vinni það í samstarfi við hagsmunaaðila.

Haustþing SSV leggur áherslu á að ríkið ráðist í endurskoðun á fyrirkomulagi iðnnáms og starfstengdrar menntunar í landinu með það að leiðarljósi að efla iðnnám og gera það eftirsóknarverðara.

Haustþing SSV skorar á stjórnvöld að tryggja að menntastofnanir á Vesturlandi hafi nægt fjármagn til að geta sinnt því mikilvæga starfi sem þær gegna og þeim er ætlað.

## Löggæsla

Dulin búseta á Vesturlandi vegna fjölda sumarhúsa, háskólanema, mikillar fjölgunar ferðamanna og uppbyggingar á Grundartanga, kallar á aukna löggæslu á starfssvæðinu. Ástand vega og aukning ferðamanna kallar á stórauðna löggæslu á vegum úti.

Afar brýnt er að hækka fjárveitingar til löggæslu á Vesturlandi til þess að hægt sé að fjölga lögregluþjónum og ráða í þau stöðugildi sem heimild er fyrir. Í dag eru starfandi 12 lögregluþjónar á Vesturlandi en nauðsynlegt er að fjölga þeim í 16 til þess að tryggja að hægt sé að halda uppi sólarhringsvakt á Akranesi og í Borgarnesi

Haustþing SSV skorar á Alþingi að hækka fjárveitingar til löggæslu á Vesturlandi til að hægt sé að tryggja öryggi íbúa og gesta landshlutans.

## Jöfnun húshitunarkostnaðar

Haustþing SSV hvetur Alþingi til að vinna áfram að því að hækka niðurgreiðslu raforkuverðs til jöfnunar húshitunarkostnaðar. Mikilvægt er að halda áfram á þessari braut til þess að bæta lífskjör íbúa á köldum svæðum.

## Sóknaráætlun Vesturlands

Sóknaráætlun Vesturlands er þróunaráætlun þar sem Vestlendingar hafa sameinast um framtíðarsýn og sett sér markmið til að efla landshlutann og auka samkeppnishæfni hans. Þetta hefur verið gert með því að vinna að ýmsum áhersluverkefnum sem eru í takt við markmið áætlunarinnar, auk þess sem Uppbyggingasjóður Vesturlands hefur stutt við á þriðja hundrað menningar- og nýsköpunarverkefni. Sóknaráætlun Vesturlands hefur sýnt sig að vera öflugt tæki til þess að styrkja Vesturland.

Haustþing SSV skorar á Alþingi að hækka fjárveitingar til sóknaráætlana landshluta. Það er mikilvægt til þess að sóknaráætlunir standi enn frekar undir því hlutverki sem þeim er ætlað við að styrkja menningarlíf, menningartengda atvinnustarfsemi og nýsköpun í atvinnulífi á Vesturlandi.

## Málefni um persónuvernd

Með tilkomu nýrrar persónuverndarreglugerðar nr. 2016/679 sem tók gildi 24. maí 2016 og kemur til framkvæmda 25. maí 2018, leggjast auknar skyldur og kvaðir á allar opinberar stofnanir. Þessar skyldur kalla m.a. á vinnu við úttekt og greiningu á gagnavinnslu allra stofnana, áhættumat og gerð öryggisstefnu, vinnslu- og skráningaferla er varða allar persónurekjanlegar upplýsinga. Auk þess sem kveðið er á um skyldu til að ráða persónuverndarfulltrúa fyrir allar opinberar stofnanir. Þær skyldur og kvaðir sem fylgja þessum lögum og reglugerðarsetningu hafa í för með sér mikinn kostnaðarauka fyrir sveitarfélögin og þær stofnanir sem þau reka.

Haustþing SSV skorar á stjórnvöld að samráð sé haft við sveitarfélögin, raunhæft kostnaðarmat sé gert og fjármögnun fylgi þegar lög og reglugerðir eru settar sem setja auknar kvaðir og skyldur á herðar sveitarfélaganna.

## Stjórnsýsla ríkisins

Haustþing SSV áréttar mikilvægi þess að stjórnsýsla ríkisins virki og þær ákvarðanir sem þar hafa verið teknar varðandi opinbera þjónustu komist í framkvæmd og þeim sé fylgt eftir.